



AXUDAS PARA ESTADÍAS PREDOUTORAIS INDITEX-UDC 2013

A Universidade da Coruña (UDC), a través da súa Escola Internacional de Doutoramento (EIDUDC), xunto coa empresa Inditex S.A., convoca axudas para estadías predoutorais no estranxeiro para realizar durante o ano 2013. Estas axudas serán avaliadas de xeito competitivo e concederanse en función da dispoñibilidade económica da partida orzamentaria 0500470088 422D 48700 “Estadías preodoutorais de investigación Inditex-UDC” (100.000,00 €) dotada a través do “Convenio de colaboración entre a UDC e Inditex para a internacionalización dos estudos de doutoramento”, asinado o 9 de xullo de 2013. De xeito excepcional, dadas as datas de publicación desta convocatoria, permitirase o financiamento de estadías xa realizadas durante o ano 2013; en anos sucesivos a convocatoria publicarase a primeiros de cada ano (ou a finais do ano anterior), atendendo sempre a solicitudes de estadía por realizar dentro dese ano (ou do ano seguinte).

Esta convocatoria aprobouse na reunión da Comisión de Seguimento do convenio con data 3 de outubro de 2013.

OBXECTIVOS DA CONVOCATORIA

Facilitar, a investigadores/as en formación matriculados nun programa de doutoramento ofertado pola UDC, a estadía en centros de investigación no estranxeiro para realizar traballos colaborativos de investigación, utilizar as técnicas necesarias para o desenvolvemento da súa investigación, coñecer novas técnicas de traballo ou novas infraestruturas de investigación ou acceder a fondos documentais non dispoñibles por outra vía. Un dos obxectivos principais desta convocatoria é que os solicitantes cumpran os requisitos de duración mínima de estadías no estranxeiro para poder optar á mención internacional na súa tese de doutoramento.

Poderán solicitar estas axudas, de xeito excepcional nesta convocatoria de 2013, aquelas persoas que tiveran concedida antes unha das que para a mesma finalidade convocou a UDC no 2013, incluso aínda que a estadía xa estivese completada no momento de publicar esta convocatoria. Neste caso, as persoas seleccionadas deberán renunciar á primeira axuda e proceder ao reintegro das cantidades recibidas por ese concepto, antes de asinar a aceptación da axuda desta convocatoria INDITEX-UDC.

A duración mínima da estadía subvencionada será de tres meses.



PERSOAS SOLICITANTES

Os/as investigadores/as deberán estar matriculados/as nun programa de doutoramento na UDC e ter vinculación coa UDC a través dun contrato ou bolsa (diferente das que son obxecto deste programa) en vigor durante o período en que se desenvolva a estadía de investigación solicitada.

Estas axudas non poderán ser solicitadas por aquelas persoas que teñan vinculación contractual ou estatutaria con outra universidade ou cun centro de investigación externo á UDC.

Non poderán solicitar estas axudas os estranxeiros que teñan unha bolsa que corresponda a un programa de formación de estranxeiros en España. No caso de solicitudes de financiamento de estadias de estranxeiros no seu país de orixe ou outro país en que tivesen vinculación contractual ou estudos previos, a Comisión de Seguimento valorará en cada caso a oportunidade e os obxectivos formulados para a estadía que a poidan xustificar.

Con carácter xeral os requisitos esixidos nesta convocatoria deben seguir vixentes na data de inicio do aproveitamento das axudas concedidas.

Para proceder ao pagamento, o solicitante debe estar ao corrente coa UDC no cumprimento das obrigas contraídas con ocasión de axudas ou anticipos concedidos.

FORMALIZACIÓN DAS SOLICITUDES

As solicitudes dirixiranse ao vicerreitor de Investigación e Transferencia da Universidade da Coruña segundo o formulario normalizado do Anexo I e achegarán, ademais, a documentación adicional especificada a continuación.

Non será preciso achegar documentación adicional no caso de que xa obre en poder do Servizo de Investigación da UDC por presentar unha solicitude no primeiro prazo da convocatoria de estadias da UDC do ano 2013 (salvo a relativa ao currículo do solicitante e do director de tese (véxase I.1) e as licenzas para os efectos de docencia e investigación (véxase I.3) no caso de que o período da estadía solicitado nesta convocatoria sexa diferente ao período solicitado na anterior solicitude).

I) Todas as persoas solicitantes deberán entregar a seguinte documentación:

1. Certificación, ou documento similar, que acredite que a persoa solicitante está oficialmente matriculada nun programa de doutoramento na UDC.
2. Documento que acredite a admisión no centro para o que se solicita a estadía. Será necesario que neste documento se faga constar a viabilidade de realizar o traballo proposto. Se este documento está en trámite, deberáse acompañar a copia da correspondencia que se mantivo para tal fin.



3. Autorización da Comisión Académica do Programa de Doutoramento da estadía fóra de España, necesaria para a inclusión da mención internacional no título de doutor/a.
4. Copia da solicitude presentada para as convocatorias de bolsas para estadias, se as houber, da Vicerreitoría de Investigación e Transferencia da UDC, a Xunta de Galicia, o Ministerio de Educación Cultura e Deporte ou o Ministerio de Economía e Competitividade. De non poder concorrer a estas convocatorias, entregárase o documento xustificativo deste extremo.
5. Currículo do solicitante e do/s seu/s director/es de tese (en ambos os casos, só se non foron avaliados pola ANEP en 2012 ou 2013).
6. Xustificación de que os obxectivos da estadía se aliñan coas recomendacións feitas pola ANEP nos seus informes de avaliación individual e do grupo ou unidade de investigación e que esta contribuirá a mellorar os puntos débiles sinalados nos informes. En todo caso, xustificación do interese que a estadía representa para o desenvolvemento da tese de doutoramento, co visto e prace do director da tese ou do traballo. Debe indicarse a previsión de publicacións conxuntas como froito da estadía.
7. Certificación académica detallada de estudos de 1.º, 2.º e 3.º ciclo, grao ou mestrado, en que consten as cualificacións obtidas, as datas de obtención e o número de convocatorias consumidas en cada materia (orixinal ou fotocopia compulsada). No caso de estudos validados deberase presentar, así mesmo, unha certificación académica, de idénticas características, para os estudos de orixe. Non serán válidas as certificacións extractadas do expediente académico da persoa solicitante. As persoas que accedan ao 2.º ciclo dunha licenciatura a través do correspondente curso de adaptación, por estaren en posesión dun título de diplomado ou por ter realizado o 1.º ciclo dalgunha titulación que permita o acceso ao 2.º ciclo, para os efectos de determinar a media do expediente académico deberán achegar, ademais da certificación correspondente ao curso de adaptación e a do segundo ciclo, a referente á diplomatura ou aos estudos de 1.º ciclo realizados. No caso de estudos realizados total ou parcialmente no estranxeiro, o certificado do expediente académico ou outro acompañando a este, recollerá cales son as cualificacións máxima e mínima dentro do sistema de avaliación correspondente; do mesmo xeito, farase constar cal é a cualificación mínima necesaria para aprobar; ademais deberá anexarse a equivalencia da cualificación media obtida a través de solicitude á ANECA (véxase máis información en <http://notasmedias.aneca.es/>).

As persoas solicitantes que realizasen os estudos anteriores na UDC pódono acreditar coa copia do expediente académico.

As persoas solicitantes que posúan certificación académica expedida nun idioma distinto do español ou galego haberán de acompañala da correspondente tradución xurada por un tradutor debidamente autorizado en España.

Fotocopia do Diploma de Estudos Avanzados (DEA), para os alumnos de 3.º ciclo rexidos polo RD 778/1998.



8. Licenza para os efectos de docencia e investigación para a realización da estadía. No caso dos investigadores contratados con cargo a proxectos, convenios ou contratos, a autorización será asinada polo vicerreitor de Investigación e Transferencia.
9. Caso de estar incluído no POD, a certificación do departamento de que a docencia queda cuberta.
10. Un breve resumo do traballo realizado ata o momento da tese de doutoramento, co visto e prace do director. Acompañarase, se for o caso, da copia das publicacións relacionadas con ela.

II) Os bolseiros ou os contratados en formación deberán entregar:

- 1) Copia da credencial (ou documento similar) que os acredite como bolseiro ou copia do contrato.
- 2) Informe favorable do director do traballo de investigación.

III) Os investigadores contratados con cargo a proxectos, convenios ou contratos deberán entregar:

- 1) Autorización do investigador responsable do proxecto, convenio ou contrato con cargo a que está contratado.

PRAZO E LUGAR DE PRESENTACIÓN

Prazo:

O prazo de presentación de solicitudes será de 15 días, que conta desde o día seguinte da publicación desta convocatoria.

Lugar de presentación das solicitudes:

Rexistro Xeral da Universidade (rúa Maestranza, n.º 9), Rexistro Auxiliar de Elviña (campus de Elviña, Casa do Lagar) ou Rexistro da Vicerreitoría do Campus de Ferrol (rúa Dr. Vázquez Cabrera, s/n).

Non son válidos para a presentación das solicitudes nin para o cómputo de prazos os rexistros de centros nin de departamentos.

NATUREZA E CONTÍA

Nesta convocatoria soamente se poderá conceder unha axuda por cada persoa solicitante.

O importe será establecido pola Comisión de Seguimento do Convenio de colaboración entre a UDC e Inditex para a internacionalización dos estudos de doutoramento a través do cal se financian estas axudas, en función do lugar de destino. Os importes máximos para estadias e



para viaxes figuran no Anexo II desta convocatoria. A duración mínima das estadias subvencionadas é de tres meses. As estadias deberán realizarse ou terse realizado integramente no ano 2013.

Financiarase a viaxe e a estadia. O pagamento realizarase segundo o procedemento establecido máis adiante.

AVALIACIÓN E SELECCIÓN

A Comisión de Seguimento do Convenio de colaboración entre a UDC e Inditex arbitrará os mecanismos e os criterios adicionais, se for o caso, para avaliar e seleccionar as solicitudes presentadas, nun prazo non superior a dous meses a partir da data de remate dos prazos de presentación. Os criterios de selección incluírán, entre outros, o expediente académico e o currículo do solicitante, o interese científico da estadia e do centro receptor e o currículo do director de tese.

A comisión avaliadora clasificará as solicitudes admitidas por ámbitos científicos e poderá levar a cabo un axuste do resultado coa finalidade de manter unha proporcionalidade do número de bolsas concedidas coas solicitudes nos respectivos ámbitos de coñecemento científico.

PROCEDEMENTO PARA O PAGAMENTO

O 70% da axuda farase efectiva á persoa interesada no momento da concesión da axuda. O 30% restante aboarase unha vez recibida na EIDUDC a documentación a que refire o punto (f) do apartado de obrigas das persoas beneficiarias destas axudas. De non se cumpriren estas condicións no prazo establecido perderase automaticamente o 30%. Se, unha vez transcorrido outro mes, non se cumpre esta condición, considerarase que a persoa solicitante renuncia e deberá reintegrar o importe concedido.

Estas axudas, de acordo co apartado segundo do artigo 7.j da Lei 35/2006, do 28 de novembro, do imposto sobre a renda das persoas físicas, están exentas deste imposto.

COMPATIBILIDADE

Estas axudas son incompatibles con calquera outra obtida para a mesma finalidade obxecto desta convocatoria. Porén, como se trata dunha axuda parcial, pódense complementar os custos da estadia a cargo de proxectos de investigación en que participe a persoa solicitante (ou outros fondos de investigación) que estean relacionados directamente con esta acción e que recollan



este concepto, sempre e cando o importe das cantidades percibidas, illadamente ou en concorrancia, non superen o custo total da actividade subvencionada.

No caso de que a algunha das persoas que resulten seleccionadas para estas axudas se lle tivese concedido antes unha das que para a mesma finalidade convocou a UDC en 2013, deberá renunciar a dita axuda e proceder ao reintegro das cantidades recibidas por ese concepto, antes de asinar a aceptación da axuda desta convocatoria INDITEX-UDC.

RENUNCIA

As renuncias que se produzan entre as persoas beneficiarias poderán ser cubertas coa adxudicación de novas bolsas ás persoas solicitantes seguintes pola orde de reserva establecida, se é o caso, por resolución da comisión avaliadora.

OBRIGAS DAS PERSOAS BENEFICIARIAS

- a) Non se poderá modificar o centro de destino solicitado unha vez concedida a axuda.
- b) Comunicar á EIDUDC a súa incorporación á universidade ou centro de investigación de destino dentro dos vinte días seguintes á data en que se produza, indicando o enderezo postal para os efectos de notificacións e, de ser o caso, o enderezo electrónico. En caso de non comunicar a incorporación no prazo citado, entenderase que renuncia á axuda concedida.
- c) Axustar a súa actuación ás normas do centro de investigación a que se incorporen e desempeñar a súa actividade en réxime de dedicación exclusiva.
- d) Presentar a súa solicitude de axuda ás convocatorias públicas que para a mesma finalidade puidesen facer no 2013 outros entes públicos ou privados, especificamente as da Xunta de Galicia, e o Ministerio de Educación Cultura e Deporte ou o Ministerio de Economía e Competitividade.
- e) Comunicar á EIDUDC a obtención de subvencións ou axudas para a mesma finalidade, procedentes de calquera Administración ou ente público ou privado de calquera nacionalidade, así como a utilización de fondos propios.
- f) Notificar expresamente calquera cambio nas condicións da estadía subvencionada, antes de que este se produza, mediante escrito dirixido á EIDUDC para a súa autorización. A este escrito deberá xuntarse o informe favorable da Comisión Académica do Programa de Doutoramento en que a persoa beneficiaria estea matriculada, do centro ou instituto de acollida e, se for o caso, do director do proxecto de investigación.



O incumprimento da devandita notificación poderá dar lugar á modificación da resolución de concesión.

- g) Comprometerse por escrito (véxase o Anexo III), co visto e prace do director da tese, a que a súa defensa se tramitará de conformidade coa normativa da mención internacional (artigo 40 do Regulamento de estudos de doutoramento da UDC)
- h) Remitir á EIDUDC, no prazo dun mes desde a finalización da estadía, a seguinte documentación:
 - Informe do traballo realizado segundo modelo Anexo IV, que conteña os resultados obtidos e onde se faga constar a conformidade da persoa directora do traballo ou, de ser o caso, a da persoa directora da institución ou centro onde se desenvolveu a estadía. Asemade, indicárase a previsión de publicacións resultantes da estadía.
 - Certificado da estadía emitido pola persoa representante legal do centro de destino en que consten as datas de inicio e finalización da estadía e que deberá contar co visto e prace da persoa responsable do equipo ou grupo científico receptor.
 - No caso de se complementaren os custos da estadía con cargo a proxectos ou a outros fondos de investigación, deberase presentar un certificado de gastos coas imputacións ás diferentes partidas orzamentarias e co visto e prace do responsable de asuntos económicos do centro. De non se complementaren os custos de viaxe, deberase entregar unha declaración neste sentido asinada pola persoa solicitante.

O incumprimento desta obriga poderá ocasionar o reintegro das cantidades recibidas.

A realización da estadía por un período de tempo inferior ao previsto na resolución de concesión da bolsa supoñerá a obriga de reintegrar unha parte da contía percibida proporcional ao período non gozado da estadía.

- i) Facer constar nos agradecementos dos traballos ou publicacións resultantes da estadía de investigación o financiamento recibido a través desta convocatoria INDITEX-UDC.

RESOLUCIÓNS E ALEGACIÓNS:

Publicación da relación de solicitudes admitidas:

A listaxe de persoas solicitantes admitidas e excluídas publicárase na páxina web da EIDUDC:

<http://www.udc.es/ensino/doutoramento/Anuncios/>



Na mesma páxina web publicaranse aquelas solicitudes pendentes de completar documentación. Nestes casos, a persoa interesada disporá de dez días naturais a partir da data de publicación para achegar os documentos preceptivos. No caso de non o facer considerarase desistida na súa petición.

As solicitudes que non se axusten á convocatoria, así como a ocultación de datos, a súa alteración, ou calquera manipulación da información solicitada, será unha causa de desestimación da solicitude.

Publicación da proposta de concesión:

A proposta de concesión publicárase na páxina web da EIDUDC:

<http://www.udc.es/ensino/doutoramento/Anuncios/>

Contra esta proposta, as persoas interesadas poderán presentar as súas alegacións nos mesmos lugares de presentación das solicitudes no prazo de dez días naturais, que se contarán desde a data da súa publicación. Unha vez transcorrido este prazo e analizadas, se for o caso, as alegacións pola Comisión de Seguimento do Convenio de colaboración entre a UDC e Inditex, a proposta remitirase ao vicerreitor de Investigación e Transferencia, que resolverá definitivamente por delegación do reitor.

A Comisión de Seguimento do Convenio de colaboración entre a UDC e Inditex citado anteriormente, resolverá todas as incidencias que xurdiren na aplicación desta convocatoria.

Para maior información: Oficina de Doutoramento / Servizo de Investigación
Teléfono: 981 167 000 ext. 2351, 1060
Correo electrónico: oficina.doutoramento@udc.es, serin@udc.es

A Coruña, 9 de outubro de 2013
O vicerreitor de Investigación e Transferencia
Ricardo Cao Abad